



續資治通鑑長編卷三百七十

宋 李燾 撰

哲宗

元祐元年閏二月辛亥詔正議大夫知樞密院事章惇
累有臣僚上言輕薄無行好爲俳諧俚語及嘗受內臣
宋用臣饋遺以其大臣彈糾章奏不欲付外又議役法
明知未完俟其令行始相沮難近者每於簾前同輔臣
議政動多輕悖全無恭上之禮宜解機務可守本官知
汝州與放謝辭此據御集閏二月二十三日下制辭曰黜陟之典咸詢
至公進退之間尙存大體惇早繇法從亟預近司肆彼
躁輕失於審重至於瞽御之列常交問遺之私比議役
書本俾參訂當其敷納初不建明迨於宣行始興排沮

務從含貸益至喧呶鞅鞅非少主之臣經經無大臣之
節稽參故實稍屈典刑噫朕以幼冲仰煩慈訓苟乖忠
實曷肅憲章其解政機往臨郡寄弗忘循省祇服寬恩
言者既數劾惇惇居位如故及惇與同列於簾前爭論
喧悖有他日安能奉陪喫劍之語太皇太后怒其無禮
乃黜之制詞錢勰所草至於摯御之列常交問遺之私惟王巖叟及孫升章有其事蓋指宋用臣也紹聖史官陰爲惇諱故於巖叟章及升章詳著略今乃仍用舊文亦太疎矣今取巖叟章及升章詳著之邵伯溫辨誣云蔡確既去章惇自知不可留於簾前與司馬光爭論役法喧悖無禮謂光曰後日安能奉陪喫劍太皇太后怒惇以本官出知汝州按司馬光正月二十一日在朝假至五月十二日乃出方惇責時光未參假也且密院與三省同進呈光差役文字蓋二月初光比時安得至簾前伯溫必誤奉陪喫劍或因爭論改法爲光而發非面與光語也十月六日改揚州左司諫王巖叟言臣竊以陛下所與共天下之治者惟二三執政大臣而已得其人

則陛下不勞而天下蒙福非其人則天下受敝而陛下
獨勞故執政不可不用天下之賢蔡確章惇之大姦臣
先已論之其次如韓縝之鄙俗不學張璪之陰邪不正
李清臣之柔佞不立安燾之鬪茸不才臣不知此四人
自執政以來有益國家者何事惠及生民者何功啟沃
陛下者何言天下之物望輕重陛下聰明必皆坐照不
待臣言而後知方陛下更化願治之時股肱一人要爲
一人之用若縝輩累百何補陛下誠惜此地虛爲所據
伏望陛下重惜名器別圖賢才任以大柄以爲社稷之
賴以爲生靈之福嚴叟此言不得其章惇罷附此嚴叟嘗入對言自
古人君最難辨者忠邪今陛下判別之如別白黑又斷
之如此之勇此自古英主所不及如蔡確章惇二人用

盡姦計欲固位若非陛下至剛至明何以去得天下人心無不歡呼鼓舞人心悅則天意得所以甘澤應之其速如此仍願陛下益信天道益畏人心治天下之道無他事只在合人心而已若人心外求之別無治道便是怨亂之端上曰會得巖叟曰既遇陛下留心治道又荷陛下聽納臣等不敢不極忠盡慮以天下之情天下之事一一上達惟在陛下久而不厭常賜收采幸甚上曰甚善巖叟朝論係此於閏二月九日按章惇罷在閏二月二十三日巖叟果以閏二月九日入對何由便及罷惇大抵朝論月日多不可信今掇取此附惇罷後其餘無大姦皆柔佞之徒易爲處置惟在常辨之使不可入而已今政府闕員中外之人翹首拭目以觀陛下所用陛下其戒之重之擇有德業聞望者進之幸甚陛下

下至明虛心以求之臣知必不悞然不可不更以告陛下上曰如何對曰大名之下有姦才少文之中多重德陛下須察柔佞憊愚無狀懷姦之人一進之在位卽誤陛下後雖知其有害去之不易也他人見陛下誤用一執政不過咨嗟歎息而已臣實與陛下同其責人以用之爲是不知其功人以用之爲非臣則有過臣不自量夙夜寤寐以吾君之憂爲憂俟陛下得賢則臣心安以此位非與百執事同百執事苟失其人則害止於一職或大者一方而已執政失人則害及國家及天下不可不謹 右司諫蘇轍言訪聞京城四門外所在白骨如麻多是昔築城開壕死損人夫東門外又爲茶磨棄水所浸雖其間已埋瘞者土薄水深亦皆發露狼籍臭腐

不忍聞見陛下躬行仁政罷去苛法民心稍安而京畿
及諸路久旱近日雖稍得雨終未霑洽未必非積骸暴
露冤氣致此況方春長養正是月令掩骼埋胔之時臣
欲乞選差一二廉幹內臣計會兩赤縣官吏相度於閑
隙地上以塲作數大墳如法藏掩其合破費用仍特支
賜內藏庫錢誠使仁澤施及枯朽或能感召和氣卒致
豐歲從轍所奏舊錄載於二十九日按轍
自注云二十三日奏此今仍見本日又言訪聞淮
南久旱雨全未足二麥並已枯死浙中米價雖賤而運
河無水客旅不至米斗直一百七十以來民間闕食甚
覺不易而所在官吏並未見賑濟及奏請別作處置臣
竊見頃立義倉至今已十年所聚糧斛數目甚多每遇
災傷未嘗支散一粒民情深所不悅臣欲乞指揮淮南

官司先將所管義倉米數隨處支與闕食人戶兼將常
平米減價出賣及取問監司州縣因何並不曾申請擘
畫兼乞體訪諸路如有似此闕食去處一例施行

九日詔諸路依二月四日指揮卽從轍奏也

先是劉摯言伏見京師所置

水磨茶場前後累有臣僚論列乞行寢罷尙未蒙指揮
臣契勘官自磨茶之初猶許公私交易故商販之茶或
不中官則賣之鋪戶自去年二月遂禁鋪戶不得置磨
然都下雖禁猶有府界縣鎮可以交易故客人不避重
出腳費津置出入至當年七月遂并府界一切禁其私
易於是商賈以茶至者觸藩抵禁須至盡賣入官而又
使牙僧制之不量茶之色品一切痛裁其價留滯邀遏
其狀百端此商旅之所以不敢行商旅不行故沿路征

商之數其虧額已多又磨河之水下流壅散浸瀦民田
被害者數邑聞去年已被省稅矣臣疑所得未必能當
所失而民間食貴茶場戶常失業抵冒刑罪又備賞錢
利害細瑣其狀不一至於傷國大體則臣未暇論之竊
聞臣僚所言多送戶部戶部送太府太府送本場本場
次第上之蓋所司知奉法取利而已安有肯爲朝廷論
義理哉臣亦聞議者云歲可得息錢僅二十萬緡以助
經費何可廢也此以利言之者也苟以謂有助於用而
不廢則何事不可爲哉亦有道而已矣宋用臣未建此
策以前不聞國用闕此二十萬緡也譬夫爲人之子日
攘竊於人取財以養其親爲之親者知其如此顧利其
奉養而聽其爲盜賊可乎伏望聖慈早賜出自睿斷罷

水磨茶場以通商賈以養細民以寬州縣稅額以免農
民水害而上以副仁聖惠綏天下之意

日元祐元年閏二月二十九日乃罷水磨茶場從侍御
史劉摯右司諫蘇轍殿中侍御史黃降劉汝莊所奏也

是日右司諫蘇轍又言臣竊見近歲京城外創置水磨

因此汴水淺澁沮隔官私舟船其東門外水磨下流汗

漫無歸浸損民田一二百里幾敗漢高祖墳賴陛下仁

聖憫惻親發德音令執政議救其苦尋蒙指揮畿縣於

黃河春夫外更調四萬人開自明河以疏洩水患計一

月畢功然以水磨供給京城內外食茶等其水只得五

日閉斷以此功役重大民間每夫日雇二百錢一月之

費計二百四十萬貫而汴水渾濁易得填淤明年又須

開淘民間歲歲不免此費訪聞水磨所入一歲不過四

十萬貫朝廷頃來改更敝法凡與民爭利者一切革去
水磨之事本亦係廢罷前戶部侍郎李定以邪諂進用
不知朝廷大體猥以四十萬貫課利惑誤朝聽依舊存
留且水磨興置未久自前來未有此錢國計何嘗有闕
而小人淺陋妄有靳惜傷民辱國不以爲愧況今水患
近在國門而恬不爲怪甚非陛下勤恤民物之意而又
減耗汴水行船不便臣乞廢罷官磨令民間任便磨茶
其利甚溥伏乞指揮疾速施行

壬子戶部侍郎吳雍爲天章閣待制知襄州從所乞也

大理寺少卿張奕知濱州

孫升十八日言奕

朝奉郎蘇子

元換授供備庫使從戶部尙書曾布奏舉也

詔親王

府翊善朝請大夫王汾記室參軍朝請大夫鄭雍爲久

任各特轉一官願迴受與子孫白身恩澤者聽 又詔

河北東西路永興秦鳳等路提點刑獄兼提舉保甲司

並依提刑司例各爲一司 禮部言閤門參定到太皇

太后出入儀衛詔依所定 禮部尙書韓忠彥等言準

朝旨批送下東上閤門使曹誘等乞許閤門依議令陞

殿進讀依舊侍立祇應參詳欲依所請兼通事舍人以

下引揖上殿班次等祇應亦合依閤門儀令施行從之

左司諫王巖叟言竊聞江西提舉曾孝廉挾私不法

驅迫知撫州石禹勤下獄差有嫌隙人李秬爲勘官非

理凌虐一月之間致禹勤於垂命至家一夕而卒乞選

朝臣就往根治重行竄黜詔差錢垂範往撫州根治聞

奏李秬錢垂範未詳何官十月詔今後蕃官立功優

異者方許取旨差充本族巡檢仍當三資令樞密院遵守更不下行 先是給事中范純仁言臣竊見熙甯後來用案問欲舉條雖曾隱諱終因罪人說出並得減等所以容姦太多至強賊克徒易爲幸免不肯改過卻致良民受害遂至元豐八年四月二十六日別立條制諸強盜已殺人強姦或犯強盜貨命者持杖三人以上知人欲告案問欲舉而自首及因人首告應減者並不在減等之例又至當年十一月四日續降敕文添入餘犯強盜雖案問欲舉而首不減一十三字以臣看詳除已殺人強姦於法自不合首不應更用案問減等外其貨命及持杖強盜一例不得減等深爲太重竊緣賊滿強盜能告別火死罪卽得奏貨今因案問通出本火徒伴

數目更多亦須坐死舉重明輕於理未當至於一名獨行強盜若非卽時捕獲則更無他人照證因疑被執賊物雖明賊若隱拒則官司無由用刑今於賊證未明之間其人便自招說豈得不行減等臣謹按嘉祐編敕應犯罪之人或因疑被執賊證未明或徒黨從就擒未被指說但因盤問便具招承如此之類皆從律案問欲舉首減之科若曾經盤問隱拒本罪更不在首減之例此敕於理最當所以仁宗朝用之天下號爲刑平臣今乞應天下案問欲舉除於法不首不得原減外其犯罪並取嘉祐編敕內上條定斷其後來敕條更不施行如此則不破敕律用法當情上以廣陛下好生之德下則無一夫不獲之冤又言近因王震在假權管勾刑房公事

竊見四方奏到大辟刑名疑慮及情理可憫公案並用
去年十一月二十三日敕只委大理寺並依法定奪更
委刑部看詳如實有疑慮可憫方奏取旨餘皆依法處
死臣體問未降此條以前自前年十一月二十三日至
去年十一月二十三日一年之內四方奏到大辟案共
計一百四十六人內只有二十五人處死其餘並蒙貸
配所活將及九分自去年十一月二十三日降敕後來
至今年二月終不及百日奏案共一百五十四人卻有
五十七人處死計所活纔及六分已上臣固知去年十
一月未降敕已前全活數多其間必有曲貸然猶不失
罪疑惟輕之仁自降敕之後所活數少其間或有濫刑
則深虧甯失不經之義臣乞今後四方奏到大辟疑慮

可憫公案並仰刑部大理寺再行審覆節略罪人所犯
及本處原奏因依令執政將上乞自聖意裁斷如所奏
或有不當並與免罪如此則刑不濫施死無冤人矣是
日詔大辟刑名疑慮情理可憫公案令刑部看詳不得
致有枉濫從純仁之請也

二月末純仁奏請附此

右司諫蘇轍

言竊見三省同進呈臣前奏乞將民間官本債負出限
役錢及酒坊元額罰錢見今資產耗竭實不能出者令
州縣監司保明除放事奉聖旨令戶部勘會應係諸色
欠負窠名數目仍契勘欠戶見今各有無抵當物力開
具保明聞奏臣竊謂朝廷將施舍已責救民於溝壑之
中其施行節次當如救焚不可少緩前件指揮令戶部
開具欠戶見今抵當物力此事不在戶部惟州縣可見